


和16
1.601
3





劉子全書遺編卷之五

邑後學 沈復榮 編輯

文編三原書下

啓

答劉石閣浙撫

一焜萬曆己未

日承過情品題實愧不敢當中心之誠達於面目昔賢謂
 有惻隱之心而後有羞惡之心陽明先生亦云面赤是良
 知宗周所恃以證此心之不終於澌滅者端或在斯而門
 下不加察焉復申前命重以教言若惟恐其日導於自棄
 云考仁人之言誦之藹如意亦曰非曰能之請學焉宗周
 乃始爽然而自失也敢不拜嘉且宗周進託於知己有日
 矣不介而孚無所假而引重千古一人耳天假之緣得親
 承函丈披露肝膽與之共學拓我津梁往往在語言問答

之外千古一日耳且宗周之於門下誼何如者其敢有遐心一旦典型之日遠而請事無從冀榜樣在懸朝斯夕斯沒齒從之以幸免於戾庶幾門下亦無有遐心故不再拜嗟乎真人品之難也患無真學問無真學問患無真師友真之爲言也豈徒曰言之而已乎使門下言許之而宗周言應之轉眼蹉跌慚負平生如真何如真何宗周從此滋懼矣久不閱朝事未卜當事所以處門下者何狀在門下必有以自處所爲世雖變而我不失其常也修謝及之願言珍重

與蔡泉州

善繼

弟自通籍卽已知年兄爲吾榜翹楚比得師事敬菴先生則先生時時道升堂入室者若而人惟年兄稱迨庶焉弟乃幸此生有真師友可藉以長善救過不至猥自菲薄虛度此生矣無何風塵相失者幾二十年至欲一挹光霽而不可得平生離索之嘆未有過此者也而不佞弟乃竟坐是以顛躓幾欲投西河之杖卽年兄視弟且以爲何如人哉感媿同心若何可言茲者大道顧化閩南親過紫陽子之鄉而問道焉因得以上下千古主盟吾黨光先生之傳且必有以教弟也二十年飢渴之思無繇自達適家表兄沈應佐之官泉州照磨慨然興懷布此耿耿

答某公祖

二月十七日

墨蹟今藏復案家

弟偶得大泌山房所刻古易有焦漪園易筌具言古易惟文王卦辭周公爻辭而已其上下象上下大小象係辭文言等皆十翼爲夫子所著未嘗與文王周公辭相合自王

彌始將十翼分入各卦又於各爻象用互體推測不免穿鑿太甚弟方欲與老公祖細細商榷忽聞台駕已行矣寸心茫然如失倚毗師保亦不知迅發之早弟咫尺殊失祖帳媿悚無地方欲馳申款款而教言諄諄已及敝廬弟生平於困苦中最耐最得力嘗讀易之維心剛中及險以說困而不失其所亨與孔子貧賤不去蔬水樂在其中及濂溪光風霽月嘗自砥礪師友千古寤歌一室可稱獨樂至用舍行藏古人未嘗忘世亦吾儒體用中得力學術然實實有命故孔孟動則曰有命曰天也誠然非欺我者惟自己性分中無限工夫無窮受用此等直浮雲視之矣顛毛種種弟心老於憂患久矣惟讀書實樂非世俗比也使者遠來直抒鄙衷伏惟慈照不任卷卷

與某

一別條經歲杪懷仰道義骨肉之愛何日忘之秋中跂足喬梓閒好音不得爲復爲悵快者久之翁丈息機已久宜不作二年之嘆而致郎君聯翩一奮飛亦其時矣奈何更爾淹留耶錄書家叔抵京接手教誨淵懷且語語肝膈語語藥不疑不佞質魯而多釁涉此危世萬難庇足殊負知己之雅前者不揣復遭尚口之羞即翁丈愛而忘其醜能不再遺請鄉里耶其爲身家之利害一弗論矣然皇家事業已壞至八九衰頹局面艱難下手冲主不免使中璫得志而小容又通其線索者東事一戰一守水火之情牢不可破兩人固利於不知也遂共卸罪之謀而廟堂之上亦安於不和以遂其苟且目前之計禍之至也何日之

有若西事之決裂又日甚矣成都傳言受圍已兩月而音
耗且絕不知竟作何狀臣子處此如坐漏舟洶洶日夕而
已視翁丈恬養家園讀書樂道真神仙中人不易得不知
何日得復從杖履遊我萬壑千巖故步耳邀庇粗安惟部
務煩瑣不勝其困一切無以報知己風便布懷耿耿不盡

與章甥一匡

天啟辛酉

墨蹟今藏復粲家

別來三月不得家音每爲懸念奶奶以下未知各安寧否
余於鎮江會寄一平安字想收覽矣嗣後至九月十三日
方得到宿遷自杭州至宿遷僅一千五百里而爲行程者
至五十日蓋風水之不便故也然途中亦頗擔警受憂不
一而足我乃爲家下人苦耳汝遭不念上人之受苦曾不
思保身立家讀書成人尚何待哉一匡勉之九月十四日

自宿遷起早至十月初三至京次城外矣擬明早進城也
一路身水路中頗安陸路中頗勞苦每夜僅寐一更耳肌
肉多憔悴也做官本是佳事而近值時事之憂危使人慘
慘不樂終未知作何結局前者王化貞在廣寧頗有料理
地方亦切同仇之恨遂得復鎮江一堡竟以後兵不繼爲
掩矣鎮江城殺戮之慘更甚於遼陽近又經畧巡
撫意不相合經畧主守而巡撫主戰將來互相推諉必爲
地方之慮是則可憂者也一路來凡起廢者皆觀望不前
無一束裘者慮禍故也余真愚也哉家眷之接且入城後
與人商量又作道理余豈不欲家人一喫官飯正不欲累
汝曹耳然亦不必掛念也孺人宜好將息但少憂念少煩
惱少力作便得無病無病亦免我念也前者所遺藥方未

知用得否一定之方豈能瘳隨時之病切不可執著向孺人藥忌石斛我悞書方中多不便也宜戒之明歲遼事平可接家眷則兒輩先生必須請陳敬伯前已面訂之倘相見先致意之此君老成我亦可資其一臂也兩兒一女皆平好否宋母平安否一匡財性頗急殊非寧福之道人生做人只是財色兩字看得淡便得壽命之原亦即向上之路我在家往往不能教訓汝亦念汝羸質如花相看然不恰我意者多矣宜猛省警戒立一規模免遺我上人之慮歲考復近提學按臨豈可又做病之理即不能上緊讀書但胸中不爲財色二字擾擾便自有落筆處免墮落人後也勉之勉之汝不聽我訓我豈能管汝到底家下一切公納也其餘事不能一一百凡謹慎而已先生及諸親相見俱致一聲初三日申刻字與一匡看讀與孺人聽之宦遊

主人書

與某

石刻見謝恭銘望雲樓集帖

辱王使君命使爲手教知道况加新殊慰濶懷官署無他事得賢者與之共事朝夕讀書談道致足樂也人生惟學問一脈滋味甚長身名泡影遇合空花世人苦不看破役役其間沒身而已執事根器甚敏淵源有素所乏者一段近裏體勘之功耳今得此靜證機緣想當時時有理會處其爲一日千里無疑也僕少不知學老而從事焉終不能少有所見病根亦只是外馳年來固嘗深省於此矣念不得如執事者之英敏時時備我鞭策耳乃承王使君破格

高誼特達相知何以克當來教及令岳家事僕尚未盡一
報按君既坐年誼定有用情處計此時已離地方僕亦
不能爲之地矣有所未盡尚需之他日徐師近况無相聞
者前致書祁世培亦慮其後事未必遽清楚故止囑以照
拂而不及地方人才一節恐當事者之過聽而累及之也
邊警未寧不能不殷藿食憂且吳中風景日異反側時聞
卽吾越亦有然者近復水災遭荒米價頗騰於舊秋小民
存活爲難當此時得良有司被以撫循之政真如赤子之
得慈母也冗病兼纏率率布復不及備所懷統惟照原何
幸菊月望日宗周再頓首海門先生證學一書附

與王金如

朝式

久聞道體違和注念不已後知稍有起色爲慰向不會友
人未卜近况若何想已得脫然也良醫三折肱不妨與顯
門一商序入炎夏調養精神爲妥而以服藥爲第二義可
乎兄平日素有調元手不知何以遂得此病應是用心太
過否恰恰用心時恰恰無心用請爲見誦之又學問中所
見有偏亦能爲色身病蓋意之所向便成窠臼則神明中
不無偏輕重之勢而病遂乘之如過靜心便病於靜邊過
動心便病於動邊如人耽向酒食一路久久發症也如何
如何前得見貽履思兄札甚有道氣知病中精進如此且
有以及於吾黨弟目之殊爲服膺甘祀一封黃精一封聊
申問私惟鑒在諸惟爲道珍重

二

崇禎庚午十二月

初歸避客不敢走候且奉弔尊夫人抱歉可知承教題主

之禮不佞誼當周旋但初在懸車則一切泛常人事皆當謝去以存息機之意遂不能趨命敬此告辭抑不佞又有說家無二尊嫡夫人在堂於所生之禮似宜稍從簡約以安存沒之心則所得孝思更遠矣俗敗風頹人將於賢者觀禮焉百爾惟誠慎自將爲禱

與陶石梁

辛未

墨蹟今藏復案家

久不領教深爲抱歉會中不得大教爲指南亦覺黯然無色前承示欲避城囂而另尋閒寂之地以求同志此於坐下甚有益第恐朋友無相從者不令此會便成虛名乎吾輩論坐下工夫卽晤言一室亦足了當而必切切於求友非徒借友以自鞭亦與人同歸於善耳弟愚見姑再舉數會俟朋友中有興起者或可延數十年命脈此時而隨意去留則無處非行教之地矣七月敬候道駕之辱會約十本奉覽并致諸友餘不贅

與族弟

以下俱墨蹟藏蕭山蔡名衡家

昨捐祠金一封十兩少五分一封十一兩少錢五分共少二錢當於世傑下一兩止書八錢可也此外若去年進學諸公應捐多寡未知收否應與催商共作今年捐數耳別諭涵初兄事僕未知其近狀但平心而論典房過月之銀原與平次逋負不同況所爭止一兩益可情處以一兩之爭而輒興詞於府縣府縣之詞其勝理乎且狎翁叔公素以禮法率宗人凡宗人之無故而興詞操門內之戈者必罰無赦奈何身自食之此必有旁人挑構之者而然亦別不能不爲盛德之累矣豈不聞人有不及可以理解非意

相干可以情恕乎若曰宿憾未平而姑借一金以發難尤失包荒之道索性彼時與詞致之於官孰得而禁之且與詞之後涵初不作應岳猶存遜讓之道則先聲一舉亦足折卑幼之禍胎一之已甚而至於再事果難解似不必藉口於不佞不佞平生於族誼頗不薄況處尊卑長幼之爭而偏袒卑幼稍知自好者不爲老弟幸以此意謝狝翁叔公死灰之人匿影避形逃世絕俗之不暇敢以門外之事得罪家長耶祠金不出借甚是定見不問其可借不可借也文甫弟改譜事領悉諸不贅

二

今若得兩造一講而見周父母以結此局更妥若今日審單尚未發出則明日謁周父母未晚但恐錢龔不來耳若今日謁周父母索性說雙城已將別田抵還寒家矣更復何說尋當與錢龔等同進息詞仰承德化耳此策甚難萬萬無疑不然葛藤不了如此則今日見周公之後不消又見義田之說一向原聽十六房吞吐並未嘗迫之今日若要割宗周之頭亦當挺身引頸付之何說公家之物耳范增事楚臨別項王曰孺子不足與謀疽發背而死忠而被射自古爾然不圖見賣於族屬小子一笑

族教不行自身始請以宗周謙罰幸揭之祠內外誥命派各房先斂方伯房二兩奉幸筭入其公榮弟應派銀五錢因量方不敢多也僉憲房派一兩二錢八分去訖

四

承委題詞謹擬上媿不文耳不足光世德原稿若改撥數處半照裁不盡

五

友人向及有盛可欽賊一事勒成數語欲付之剞劂稍稍流傳以安梓里未知妥否其刻貲可得一錢有餘老弟能任之乎謹以奉覽

六

山價事領悉諸宅雖倒戈而旋滅言深修須以玉帛相見但老弟有奪書之事恐不好違調停姑託陳小集行此意矣不盡

七

改本因欲再訂正一二字故索歸萬不可印刷且此本當合以內傳又將有行也又囑

八

近繼亭伯本宗亦言其短主其議者甫南府君也肖翁家教不苟如此可惜不曾立得小傳誠闕典也

九

以下二通墨蹟藏魯錫光家

早間辱顧正坐冗間亟出迎老弟已行矣小价傳老弟同陳堯道來僕正欲訴其事世未有狡險如堯道且旁睨無人者先年堯道賣田於林林轉賣於戴堯道已欠戴氏租二年經衆親處勸戴華讓租一年以為催頭找價之貲而止收所逋之一年堯道聽之隨親筆書推契聽戴華過割華遂將所得一年之租納稅契而不佞又隨乞恩於周父母作捐助古小學訖會戴以事別去堯道即將一年之租

三十金親手交付蔣二經僕親收其事如此今乃乘戴華物故謂死無對證便與刁詞欲奪此田將置僕於何地且置周父母於何地人之無良一至於此僕卽欲置之不問則小學金錢仍當吐出矣所以怨者以陳堯道之親甥羅銘亦與林有交易今朦朧混告不得志於戴亦當得志於林自謂兩手不空又逆知不佞決不出書帖所以如此孟浪豈知事經僕手不得推乾淨客也此人素無行舊爲仇家所揭其惡款直爲蓋載不容僕不敢輕發以傷雅道倘此後又作風波必欲求勝則僕亦有以處之恐刑廳之衣飯碗斷矣若來見老弟可以此諷之使僕得少全忠厚面目也愚兄宗周頓首

論宗祠事但可置之不較彼當自息耳大約任事則任勞任勞則任怨人情物理無足怪者明日若到宗祠一語不道及可也卽渠有言有揭亦并一語不道及作答可也不同調之人惟欲挑人只用以起兵端若一開口則墮其術中矣抑此亦進德之大端也吾輩學日不進只是口過居其大半傷易傷繁便是大惡切忌切忌於老弟尤其是頂門針前日令一族兄云亭山戎字號租米若揭得起作見租則當年者大有便宜此不增租之增租也僕應之曰亭山之新租其始自玉宇叔當年見宗祠買得祭田卽攘臂收租亦賒租也今之得升爲見租者此一年之租皆任事者委曲賄出計七兩二錢並不支費公貲而舉族不知惟曉曉以小租爲口實我若再將此田升作見租則又要小租

何以應之其人解頤而去繇是觀之流俗之人豈可與之談仁義也哉明日僕因病禁足閉關不得赴祠矣尊長而下舊禮切不可廢并囑愚兄宗周頓首

與趙景毅按臺

繼鼎乙亥

故光祿少卿周寧宇先生敝鄉之大賢也生等皆嘗及著蔡奉之而其冢媳劉氏又係宗周之族姑茲者劉氏有女嫁於汪而驟死道路之口僉謂事坐其舅氏汪遴遂以冤命事告臺批府解報本府業具爰書解報矣事關風化生等遂不能無說而處此夫周氏以名卿女孫而嫁田舍郎又不數年耳何負於汪遴而逼之至死一可疑也室家反目至雉頸而死婦人時時有之獨周氏死於伊夫外出十日之後釁從何起乎二可疑也卽坐舅姑督過而雉頸於舅姑亦何罪焉死而訃其家少全親戚之情亦事有必然而周氏之死不訃至母家不得一臨其喪三可疑也卽婦人而雉頸矣發喪成服擇日而殯葬又事有必然而周氏死於戌刻殯於卯刻葬於卯刻總不越六時而閨中之秀倏化而爲一坏土傷哉四可疑也死卽死耳又必割斷其外吐之舌而後殯是可忍也將何事不可爲五可疑也試問汪遴頭止之髮胡爲而髡乎非剪於周氏之手則誰之爲乎汪遴旣無髮周氏自應無舌的對的證又有不止於可疑者而爰書槩不及焉姑據蕭山縣申文而轉換之使周氏致死之情不自汪遴遂從免脫矣嗟乎生者可惜死者之情尤可惜死而出於寧宇先生之後人尤可惜昔者孝婦舍窶東海爲之三年不雨倘周氏之死或別有故而

上官不爲之一暴寧不上干天和世道之降也聚麀不出禽獸而出於衣冠鬚眉不生於男子而生於婦人猶幸有一二婦人女子撐持世界耳并婦人女子之義而晦之是率天下而禽且獸也得無錢神有靈三只無地乎仰祈老公祖爲名教綱常鼎呂庭審之日一干人犯直窮到底務得真情不妨再發廉能有司結案使生死兩無憾焉則世道幸甚人心幸甚生等合辭以請者亦與爲世道人心計非有他也臨楮主臣

與子沟

乙亥九月

以下俱墨蹟藏

家

出關已後至晦日邸蘇至茲月初四日方渡揚子江抵揚州來船不肯前往又復換船停滯兩日矣近又以天氣太溫不覺傷煖生疾發咳以至夜益不寐前過鎮江欲訪名醫又因孫老先生行急於趕程一晤而失之此後更無問醫之程矣孫老先生於廿五日起程登舟停兩日方發欲遲余一會也至鎮江又停一日相待而余竟不及上是以失之今換船則徑到濟寧矣別後未知奶奶以下俱平安否仰事俯育守身讀書俱汝分內事所當喫緊者不必我鳴也儀廷兄署中之便留此以報平安諸不及贅父字與沟兒知之

乙亥十月

前自揚州有一字寄回後自九月望後自宿遷起陸程行十餘日至卅日至德州暫次於德卽遣阿七賚疏進京告病倘得荷聖明俞允行還故里亦晚節之穩著素願也第恐機緣難必未來之行藏總付之未來而已自江以北一

路追孫洪翁圖一會而不及及余已至德而洪翁從水路前進尚未至德卽未得俞旨而進京亦須在洪翁之後也一路自起陸則身體甚覺困頓偶因黃昏寫本十數行便致眼睛失光歷十數日尚不能復舊狀氣體之薄一至於此將何以副一官乎念之悶悶陸路夫馬皆出自顧不下三十金遵功令也流寇之警在河南頗決裂今聞入湖廣矣國事如此未知稅駕之所此身一出門便屬之君父死生利害共之君父而已別後未知阿母而下俱安康否叔婆外婆內外皆安康否阿母須戒氣節飲食便可漸安若病時切不宜頻用藥悞於庸醫之手切記切記妹夫未知進學否若不利便可潛心讀書爲破釜計勿得悠悠忽忽自墮一生前古小學交付王姊夫帳尚未明記得二十金外又有二金一封交阿姊其後則有四十金原封叫阿姊俱可討王姊夫所存帳本登記明白以便日後查點通欠小學銀幾有五十金連章關然先生在內今可將我所存大家銀內支二三十金付王姊夫畢此後廳工程若再有官府作興造左右兩廂便當一并落完矣又宗祠交盤帳已甚是分明弟恐恒所太公難爲人事致日久不免又生風波汝可到祖澄叔將我所付交盤單取回仍寫一單謹藏之以便後日解說張本要緊要緊汝在家切不可管外事家下僅給得衣食便萬事皆足若復營營爲求富之計亦終不免天道之覷矣杜門讀書切切反躬近裏痛自鞭策變化氣質爲第一義切不可先矜聲名慕外好高效世俗子所爲前汝有萬言策一通已落世俗子窠臼中若不

知自處轉入轉深決難出頭矣家下內外人不馴雅者皆當處之以法務明正大切不可爲掩耳盜鈴之計至囑至囑冬十月朔日父書與灼兒知

三 乙亥十月 以下俱畢蹟藏復家

前揚州有書自章儀廷參軍寄回外有硃批執事六件大
牌二面雜書一包報本一封未知到處其報本可送還商
平伯也至德州又有書寄回內及大小書與宗祠交盤二
事可行之無忽其本家祭田費載之永肩願力簿內者汝
可細查本利或該討利或該討本須一一明白其存之鄭
大房店者可一并明揭一借契以便清楚本利若仍前後
先零碎必至日後費口語者也此我晚年心血所注弗得
草草三房姜家田今冬必可收見租當遣人去立契其租
可得二兩三錢以二兩付當年者以三錢納糧若依舊在
三房收下則聽三房發租應三房納糧而已可多拜上三
叔婆此項原爲大家做事他日計畝分房此田仍是三房
得分也不過朝四暮三耳其今年我代三房發租銀未了
者可向三叔婆討還以了前件二叔公當去本銀五兩可
以吾箱內衣當還三兩其欠下二兩者且得明年雙井係
二房當年我家該發租二兩可將此租除下則此項清
楚矣今年任家坂軍田租五兩五分我已預發長官訖此
租徑還我大家款下但須納錢糧耳訖之大家費我意欲
再生息一二年共得一百四五十金買田以十畝作州山
祭田以五畝與茅山府君祭田方寸心願而恐日久而化
爲烏有若有相忘者或與或買結此一局未爲不可奶奶

以下未知俱康寧否可日常勸汝母好將息病已一年而尚未強則將來年愈衰而病愈進矣目下亦無大事未了只是不放債不放月錢不做會不買田宅硬得家人無事但恐樹欲靜而風不與肯休汝須做主張也至於待下人所持者常進京而細小之失亦須置之不問庶免多多煩惱前所留贖儀未知已經還債訖否我只為還債一事至於辭受之際往往放寬事後多悔亦每為之不得於心細思持身涉世之苦真是啞子嘗苦瓜口中說不得汝亦知此意數年來只為祖宗未了事亦時時多委曲負嫌負謗其心亦然汝可將和叔發出一項田與租已是穩實著落否若有糊塗汝常見家長必求明白而後已凡義之所在雖後生子弟亦不得過持也又如十六房戲子罰銀我既出門自然不能如數亦須量處數金還取此兄弟以全我口信切不可全作相還舅母之債而置苦主於不問汝在家只是杜門不管閑事便好我家之一事便是十事我家之一錯便是十錯百錯也我一路多病如何可做官德州上疏後尚未得旨只得前進河間府候旨時十月望日也兩孫皆可節食以免病囑囑

四 乙亥十月

又議董編未刻

汝母未知康寧若何久病未痊入春必當復有痰火之患汝宜朝夕寬慰須先意承志不至動其喜怒便是調理之方大抵須少與人交涉不管外事不營利息則家中自然無事無事則計較恩怨是非好醜一切不到面前自然一家和氣多康迪矣此汝身上近日絕要緊事汝母以等閒

而置之不講日後不免有悔古人稱入孝出弟盡在日用當行之中若於此蹉過則亦別無用力之地矣韶光自弱冠之後其爲老大之階如駒過隙正一瞬間汝不思力學向上而一以流俗自困將來有何結果貧賤人有貧賤人流俗他終日營營出入衙門將嘴騙舌入於下流生長富貴之家有富貴人流俗如傲僻自用結交廣譽蕩心佚志苦言不入於耳益友不交於前漸流爲放僻邪侈之徒其惡視貧賤者殆有其之矣汝須著實克己敬身遷善改過一日做一日工夫一時存一時天理庶幾將來不大墮落耳念之念之

五丁亥十一月

寄來回言府尊書是何語誠猶不能感人而況僞乎只因平日不講立誠之說動口是爲是欺便是終身之大惡戒之大抵此等皆不當與譬語之危事欲其不與我平日往往輕與危事不免遺悔意章羽侯只是不管閑事不特有益於己亦兼有益於人此等道理都不可不知也安可勸他讀書勉識幾字將來不致墮落慰我之心陳氏外孫亦然都可去說一聲叔婆未知康健否可致意大舅婆之變深爲痛悼今先寄回奠儀二兩送下去誠恐日後又不得設處遺無窮之憾耳塗中交際不過三五十金一路雇夫馬到京所餘不多至年盡便當絕糧開春急理還鄉之計已無買路之資京中伺察甚嚴卽一人出入卽一魚一菜卽有事件視之往年京兆時又是無懷葛天世界矣陳先生平安家人以下俱平安餘不盡及冬至後一日字與

灼男知之姊夫妹夫處俱不及啟可致聲

六

京師一冬天氣甚和無往年之凜冽處之不甚苦只是人情凜冽也陛見想當在臘月初想歸計當在春仲時然全未可必聽命而已家眷避京之說竟不必說起卽在此做官家眷亦不可進來也日下從人太多日終不濟茶食不調已無可處矣前冬至書寄書歸娶奠儀三兩自百廿六房六叔公寄回想已收兵數則可卽送下道墟也汝宜杜門讀書絕不可管外事時時記我言奶奶可好將息其餘不能一一風便報平安十一月廿一日父字與灼男知之

七

丙子正月

載董編未刻作第二書

別家又及春矣日今流寇方殷聖上焦勞無已身廁輦轂之下者其爲跼踖靡寧可知也總之此身一出門便屬之君父死生利害與君父共之而已汝在家宜一味謹身節欲居家以節儉爲主律身以名教爲防執玉捧盈終日兢兢不至墮落方稱克肖也汝書中言及應事接物不免多錯事後方知此說甚有關係須仔細痛加猛省人之欲善誰不如我然而終不免於下流者只爭方寸昏明之界事到面前滿腔子非名則利一團私意用事障蔽靈明如莽漢登場盲子取道事到面前至此一改便是利名私意障蔽靈明安得不佹佹無從若事過則身在局外若以我對別人事其心清其眼亦清追思前日所爲已無及矣小事猶可若大事則敗壞了一生所謂立行之差一城莫償者是也此事心之學所以不可一日不講同是一輩人按其

心而賢否乃判卽同是一等心按其隱而得失乃殊今欲於同然之中而察其迥然之別又於迥然之中而求其未始不是同然之體則宜如何以用力乎途中交際不過三五十金一路僱夫馬到京所餘不多去冬卽已絕糧今意欲作還鄉之計已無買路之資京中伺察甚嚴視之往年京兆時又是無懷葛天世界矣爲之一嘆

八 丙子 石刻見馮氏慕義堂帖

出處二字極難言做到老學到老離家之日挈定是還山之局豈知一路扶病而來友人之不相諒者輒以我過於求退爲私意我不覺惘然自失稍易其初心及到京亦意在一覲天顏之後便可作抽身之計豈知西四叔相誤有誤朝之事則日在待罪矣文相公去位溫相公擅政最忌我入朝遂將范仁挈往而我之進退維谷矣方文相公去位之似卽陳先生亦以爲不可仕而豈知業已見朝又日在待罪棲遲三月不好告病勢不得不候召見召見之後立有司空之命方決意辭官而士大夫往往有相阻者曰昨日陛見趨躡應對是無病人而遽引疾以爲決不能仕非懟乎余之心亦有不自安者勉強拜命真如牽羊入屠肆耳及旣拜命則不便再容易抽身只得以老病之身許之君父意欲得當以報君恩以了生平耿耿之懷是以有前日之疏疏上而聖意怒甚錢相公票一嚴旨以上發改票溫相公又加嚴以上而上意解矣乃親爲改定以降蓋特恩也今者朝事愈不可言矣山林朝市總無自全之地未知瞻烏之謂何老臣不憐七尺以報國終爲職守所限

局局轅下而已家下不必掛念也見汝書中所云不覺有感故筆至此

九

丙子四月

載董編未刻

王璿到京知汝母病體已少愈始信從前顛倒皆藥之悞也汝此番不來鄉試甚合我心汝若大綱小節皆能繇此而類推之則孝弟之道不可勝用矣然既不進取便不得悠悠空過日子讀書之眼力發向上之志漸奪其流俗之習力矯氣質之偏漸改其虛憍之見一味闢然爲己無妄交朋友無蠟取聲名日查已過日謝外事庶不至有墮落之虞念之處世如大海迴瀾扁舟出沒非有長年把柁其間而又力持篙楫以救正之鮮有不底于顛沒者矣我近來身體粗安漸入夏景精神愈弱思得人參補之然力不能也到任又借過二十金口不嘗魚肉之味身不著冠屨之華亦并絕人事之往來每月止用五六金而俸薪全捐皆從稱貸而給也官邸蕭條如此其他可知矣諸不及贅

復朱未孩淮撫

大典丙子四月

以下載董編未刻

某忝附梓里雅切斗山之仰惟是進退屢違雲泥泐絕屈指自癸亥一晉龍門而後契濶於今也我勞當如何乎昨百小草之行道經貴縣會台臺方以兵事戒嚴鳳泗間乃辱使者偵之河干緘書鄭重既慰積懷且增感愧俟爾三時日望台臺以壯猷之元老提戈南北殫此潢地輩如摧枯拉朽而中外事勢決裂至此真有平良莫能信箸韓范無可運籌者則亦豈能以鞭長之技獨責之台臺一身而台臺苟畫地自處業已勞苦而功高矣其如天下事竟莫

知所稅駕乎念之不勝於邑增兵之議想當事者自能主持以弟之愚闡外之役例得便宜行事今欲留久戍之卒培糜行糧無益成敗不若召募於上著操縱自如且可以爲長久計庶幾事半功倍耳東南半壁端賴長城伏惟獨決勝猷坐操機要以慰天下蒼生之望

與舊太守石公

崑玉丙子四月

恭惟先生遺愛在吾越至今四十餘年如一日也憶宗周髮未燥時每聞里人言先生政事或忘之或怪之或欣慕而愛慕之所見不同同歸於師保父母之懷乃信先生爲古之人也旣而嗣君令長興遂得交嗣君飲河知源如觀先生紫芝而嗣君轟轟大節果能不負先生家學則不肖愈奉先生如著蔡久之又辱合孫宜興令不忘故人之誼辱以世講今年來京師又交臂於京兆君因悉先生起居而喜可知也今聞先生壽辰九十矣三湘七澤之間有翩翾地行神仙焉而天下且望以爲儀雖無老成尚有典刑先生之謂乎一日聖天子修三老之典進先生於廷乞言聖憲且爲宗社禱還福乎然先生之道不盡行於身而托於後之人其爲遠且大者豈必有量也願先生時加七箸以膺旋祉宗周旣辱遺黎以而世誼恨不及一登龍門在執爵彝林之列而輒不禁其向往之私積之年歲未有謾也敬爲賦抑之詩以獻獻先生之進於睿聖也幸不加鄙夷而還賜之教後學幸甚

與石梁二

丙子

黑蹟

藏復祭

令姪來接翁臺手教離索之餘如獲珍寶讀至安其身而

後動易其心而後語又是弟當官之日頂門一下也佩服佩服側聞郡城另起嘉會日與求如子虛諸君子相周旋知道韻日遠新功日遠此非真有一往爲到家計者不足以與之而惜乎弟之泛泛於苦海終無所稅駕也入長安見冠蓋之下多不識字人無怪乎時事之不競其賢者亦不乏談宗說法仍是苦海中浮沉生活求如文簡先生所云認魚背爲海岸者亦不可得沉進而求之願先生力以師道自任爲世人作津梁吾越雖僻壤而不出戶牖可以風動天下則自新建而後天相傳以及於今日爲海內之所心儀者固已久矣願今天下談新建之學者未有不借路葱嶺卽當日一種教法所謂天泉問答等語近日亦不復拈起高明之士談性宗而忽彝倫卑暗之士樂倡狂而惡名檢職此之繇今卽如來教所及與世味日遠者自與道日親透此機括上下皆收所謂中道而立能者從之者也弟資性本鈍久入鑪錘未有發鍊處每當官遇事輒窘步近日坐此劇地益見憤憤終將踉蹌言旋耳目下病困日甚正有事乞骸倘荷主恩時放則負牆有日矣令姪資性冲穎自是名家汗駒因試事匆匆又輒入南雍告歸未及頻促膝長然而別行便附此耿耿仰候起居伏惟慈照不盡神馳

廿八日弟守周再頓首

與祁世培

影作丙子五月 以下載世培未刻

梅邨作別遂逾寒燠令弟來得悉興居知將母之暇讀書園林不交城市致足樂也然而豈遂忘君父之焦勞乎計兩年以來充養已粹識力益充於匡扶多難之方正君善

俗之效固已不動聲色而得之可不俟再計者瓜期將及長安諸君子無日不望門下脂車星駕以終六用邇者班行落落正氣孤危言路一綫卑者出於外吏賤者出於廝養可爲咄咄怪事則天下事亦何由而濟願門下之投袂而起也僕衰病侵尋誤沉苦海日以爲歲叨冒至此豈敢尚居恬退而劇地非殘軀可以嘗試受三月之俸終當作拂衣計耳風便一布耿耿聊申勸駕之忱幸弗以卮言外之世道幸甚

與李緝敬太常

日宣丙子七月

聚首數月知翁臺晚年學力大進其一種元氣深醇處居然南臯先生甚矣翁臺之善學也而弟動以圭角露人大是不及翁臺處日來所以提撕我矯勵我者已不一而足媿弟鈍根不克承聆轉媿昔賢知己耳時事多艱別無下手處止恃一點元陽轉動得陰霾之氣便是造化在手願翁臺勉之要之進學之功亦無時而可已也一言作別無任黯然郭黎眉杖策留行聆其言論風采温温道品也有友如此亦稱不孤

與賀中洽津撫

世壽丙子七月十九日

適有傳紫雲地方去此不過百里而遙果爾則公宜環甲以待矣看來人情只是怕死不肯一戰所以萬事瓦解此張司馬之所以無濟也津地又非良涿等處比若肯拚一戰以爲守事必萬全幸公努力打起精神辦必死之志爲三軍但干私事業在此一舉中貴之遣上亦只是懲行間之愷也特來督一戰耳然而必敗敗則諸君子又好爲出

劉子全書卷下
路天下事至此奈何公但謹操戰守機宜先預辦一戰
勿使其至則受我羈勒可也大司馬牢坐涿城不出一步
料不數日後此十餘萬上卒且譙然一變而敵身公可急
急移文請出師之期弗得作懷外觀也

與馮彝仲州刺 丁丑三月

時事之日非也即天末風塵尚不能容一髮項吏可勝扼
腕頃復得之友人知秉軸諸貴人之求多於門下且未有
已也白璧不可為自古嘆之然在有道者處之以為適得
吾素耳而豈以是為加損乎哉望門下益證此無加無損
之體以時葆任之盛德大業皆從此出則其托為吾道之
鼎呂當更有進於今日者矣

答吳朗公給諫

執郵丁丑五月

赤城紫氣時從天際蜚來輒慨然夢想其人言念明德埒
之在三中心惋結若何可言而某羸薄之姿踟踟之識不
能一振平生少酬大君子剪拂之誼其為媿死欲絕可知
也咫尺霞標缺焉聞問殆為是乎乃辱大君子終不我鄙
夷一旦重以命使遂拜台函偶坐病中整襟捧讀如灌甘
露五體皆涼至披示素心之際愈令人向往不能已已嗟
乎世道而交喪也窮於上者必復反於下將在吾黨諸君
子而門下其東南之領袖乎充其所詣當為恭愍公後身
無疑望門下努力僕少而不學晚竟荒頽何足以辱教而
倦倦乎就正之是托亦愈以見門下之虛懷嗜道有如此
者矣稍閱諸語錄多得之深心力踐非掇拾蹄涔者比亟
擬一效管窺柰坐病中不敢草草姑先此佈復以謝台雅

俟稍閒當走一介上謁台階因以報命也

答徐蓼莪兵垣

耀時丁丑六月十七日

居長安數月滿目風塵而獨存一二知己於傾蓋之間時時心相許也及其輕言把臂去就殊途回首五雲當國難方殷之日天下事危如髮絲去國孤踪又未嘗不幸正人之在位以爲動勳幹濟之本而喜可知也還家以來鑿坏自遜不敢一交通人雖以使節儼臨尺五台光久稽訊候乃爲高誼所先翰賅交賁道義之愛不啻盈之毫楮間感何以當督漕一役於今日似屬駢枝而在賢者旣膺此事任便應就駢枝中理出痛癢血脈以爲下手之方乃者小民之膏血已竭而計部之誅求不已斬木揭竿行且及之江以南誠亟亟爲消弭計則竣此役也以入告我后必有說矣又如敝縣山會來歲之催征已及五七分而藩司起解尚不知坐在何年卽累歲之逋欠間有分釐而當事之參罰亦往往難以數計由一邑而全浙可知也言吾浙而天下又可知也門下在事有日必已盡得要領似須會同藩司徹底清查一征一解永昭畫一使中飽者無以措其上下之手而墨綬亦從此望風則所以默扶宇內之元氣以培國命於萬一者計必於此矣願門下力圖之

答吳朗公二

丁丑十一月二十五日

再承使者將以手勅并示清音如聞天籟展誦之下雨腋生風昔人閱輞川而已疾今殆過之詩中有畫故也況語語心印乎賤體本以勞傷心神而成痼疾數十年於茲不謂老而增劇遂不可支止因平日事心之功多不得力子

細簡點畢竟是從欲惟危因思濂溪主靜立極之說是千
聖入道法門也僕老矣深究此事庶幾朝聞端有望於指
南而前者門下既已示我精詣之一班如冬月夜臥恍悟
天樞之說與前人若合符節媿服膺之未能耳病中漫加
點綴因神思忽忽相遇在離合之間呈教之下當不禁其
一笑舊著一通未嘗敢出以示人謹呈清覽藉手就正

答陳生三

戊寅一月

楊忠愍公序言寄上殊媿骨性不似昔人不免作隔膚語
有辱先正耳不佞每慨及今之世天下喪亂無歲不告變
吾儕不論山林廟堂無不當以一副頭顱許之君父誠不
可不一日讀忠愍書讀得忠愍書方可辦得忠愍骨於天
下事亦稍有濟乎未可知也如足下固讀天下書者也敢
以爲勗

答李道之

沖戊寅六月

久有雲門之興因病不果入山之招得之欣然不能奮飛
奈何正如苦海中人得遇舟子垂手頭出頭沒靡切徬徨
耳身世之緣到此時不得不簡亦不得不斷知其無可奈
何而安之若素道亦在是乎難得是山中日子幸無荒度

答范太蒙銓曹

鳳翼戊寅十二月

不佞仰止門下自靜之亡友也垂三十年於茲矣紫芝在
望清光自遠徒使人作天際真人之想卽大江南北林臯
之聲氣自通而聞問闕焉動如隔世則其爲人之委瑣荒
頓亦自可知何幸門下終不我鄙夷也一旦賜之清問倦
倦乎道義之愛溢於肺腑重以鼎臆有加無已無亦觀人

所友自靜之兄來則門下所謂見其似人者而喜矣因念
同人之誼際此時艱吾輩雖永棄人間事一腔熱血亦自
縈縈竟不知灑之何所惜未令靜之見耳讀聚洲狀同此
感慨至椽筆大書已足爲九原生色恐繼此而作者之難
爲言也矧在僕之淺淺者乎且久坐病中亦卒無以應俟
得當而圖之王生書劒飄零殊媿無以少展平生幸其氣
宇昂藏有父風天當不絕聚洲後茲因其行也附此積悃
兼志謝私

答章爰發邑令

重乙卯三月

榮發時因病不得出祖抱歉何長雅念兄才氣百倍時流
而一片熱腸遇事淋漓往往見其至性一行作吏定知治
行在東南爲空谷音况彈丸福安乎及接來教而喜可知
也福安雖陋且褊小而處前人玩愒之餘政自不廢更絃
至施爲先後緩急之間亦復恰中機宜動無扞格故不及
一載而令行若流水士率其方民安其業稍有成效之可
紀誰謂三代果易民而治而期月三年之用果徒托之空
言者耶凡若此者兄旣自信得過不妨持之有終而益復
本之以敬慎之心出之以潔凜之操和之以醇悶之象雖
古之循吏何以加諸况又有進於此者耶至於時勢偶遭
其艱俯仰上下有不得動如吾意處亦只得隨緣付之不
便於皎皎自立凡立身行已但勉其大者而已所云青苗
可且放過者是也吾輩近日居官立朝只得勉其得自由
處姑寬其不得自由處亦已濟得八九分不必每事勾手
也其富貴利達之徒一切智巧之士往往反是所以時事

至今日不可言可徒委過於君父乎言之浩嘆願吾兄以宰一邑之精神釀宰天下之力量惟其所遇以時措之將天下事尚有可望也僕老矣無能爲矣去年一病入冬方少痊卽有改葬二親之役茹荼力瘁不覺日與死隣畢竟辜卻兄臺期許矣

答王生開

己卯三月

別後三接手教皆以先公千秋之役見委僕非不仰體孝思黽勉效其生平但先公文字亦不可草草塞責而僕年來老病浸尋業已久謝筆墨重有先人大事入春以來慘魂未定日夕坐草土間耗其筋力盡矣思得男子在世間非出而死君死國則入而死於父母此身非吾有也不佞之於先人之役也亦白髮兒就死之日幸而不卽死亦豈能搦管作一切應酬文字惟有從容圖之異日以報尊命耳且云有滇南之行總在字內聲氣往來可卜也幸無亟亟

與徐亮生大參

人龍己卯三月

簡命非常海宇卜昇平焉門下將何所操以爲入告之謨乎僕念此時國家事十壞八九局面已成卒難更弦似非賢者展布四體之日故雖以李綱之賢而不能挽宋駕之不北吾輩於此惟有蹇蹇匪躬卜成敗利鈍於天而已倘其萬難下手則與其雷同附和僥倖一切之功名無寧守正違時少留國命人心於萬古而匡濟事業亦已多矣

與熊浙撫二

己卯九月

草野孤踪不敢與聞當世事久矣獨於臣子之義不能忍

然春間邊變曾具荒啓附友人之便一奏記室贊門下勤王大義會門下已發師北向旋得耗澤且退友人遂持原啓不果上而還耿耿之私徒懷依眷茲者復聞事勢洶洶百倍前日上遣君父焦勞不知當作何光景普天臣子聞雞擊楫宜亦不止於前日者矧門下人倫冠冕忠義性成而且以首藩爲天下望乎不佞度今日卽有勤王之詔亦卒不及下下亦不能卒到地方所在地方倘奉詔而後從事無乃遠汲西江門下決拯溺救焚之計莫若立選見在營兵借餉藩司卽日北指一面傳檄南直江省次第並進兵勢大集遠近響應進則可以佐北師之緩急退則可以遏南下之賊鋒所係宗社安危何啻九鼎成敗利鈍在臣子雖不敢預計然以門下之義卜之以宗社之靈我知其必有濟也不佞老病顛連中目擊時艱至此偷生無地輒不揣固陋一布區區亦以終春日之役不忍自負其仰望初心耳惟門下原而鑒之事亟矣蹉跎一日抱恨千古臨楮涔息繼以涕零

與成台道

仲龍辛巳正月

我越人之告饑也祖臺亦旣耳而目之以視台郡稔歉相懸大是向隅抱泣蒙祖臺惻然痾瘵方與郡大夫商拯濟之策隨聽本府一面申文行糴台寧等處我越人權若更生宗周乃敢率二三里人齎本府印批告投下執事宗周遵郡大夫之政統計郡城中限坊儲米宗周所求給於台者不過二百石其加賜焉則祖臺曠蕩之澤也伏惟照驗施行俾不至爲他方譁仍乞掛號批迴且無虞於出疆宗

周借此舉爲一方社倉帳本稍俟青黃不接之日平糶而出之自此時斂時發垂之世世而祖臺造我子遺之德亦將垂之世世矣且郡大夫請糶之舉亦豈爲是沾沾者果能家賜而人給人人遂登熙皞政欲借以厭人心而通地方之血脈陰杜其囂凌爭攘之氣耳今必曰豐歉不齊之數委之造物有餘不足之見聽之人情則一家之中父子兄弟之際且有秦越視而不顧者矣而豈知天下之亂卽從此而起甚矣遏糶之不可訓也非祖臺由己之飢而本之以大道爲公之志亦孰與化近日之風氣挽阨運而道天和臻一世於仁壽之域乎

答駱學師

光緒

辛巳

昨承枉顧殊失倒屣抱歉何似冷然之會神正王也歲計在春吾黨幸不辜此惓惓而僕亦竊愈爲神往已乃僕則更有請焉宮牆本設教之地自官司無教而降之有事於鄉社如吾越和靖交成兩席猶之乎古人之下庠也然而聖學不明於世久矣士而號爲有志於道者猶不免各私其見各守其方視下庠一席且如畏途往往望之而卻步於是不得已復有冷然之會屈師席於梵宮將使環橋之聽謂吾道有所不足而必假途於別所以爲接引之地非所以稱師嚴道尊也況當異教如簧之日乎僕竊慮之矣今請先生於是月再舉二祠大會稍存餼羊之意以爲士子鵠此後凡與大會者不必強之冷然而凡與冷然者斷不許不赴大會如此則風尚之地端而於世道人心亦少裨矣僕老而坐廢僅作隔膜之見如是以俟裁擇

久違道教無任渴私頃令弟傳示絳席下於陶氏喜得便於從容聆教矣不意一疾久纏日擁牀褥遂至道駕枉臨失於倒履抱歉可知也弟積病之軀日坐死境不謂遷延至此遂增奇症度無起色一味聽之卽醫藥亦了人事而已以故雖拜君命有日竟不遑遵不俟駕之義稍展臣子之忱老臣處此無地可容直付之無可奈何耳若謂或高難進之節或抱相時之幾而故爲此遲遲焉則義之所萬萬不敢出者也自顧平生絕無寸長可以自挾而處此主憂臣辱之日普天之下誰不切同舟之懼而謂山林尚有煖席乎今且自度此身可以許國則興疾一行自不容緩惟明教之僕倘日加困頓卽欲襆被載塗不任也抑終奈

之何乎耿耿此心不敢以欺吾君父其敢以欺吾友卽不敢負吾友也其敢終負吾君也乎哉然而大義見繩寥寥空谷得之者輒爲毛豎而心戚戚其靡寧其能不奉爲指南以請益乎力疾草布不盡欲言別諭月峰先生品望偉然而士論間有異同弟亦不甚悉也然弟自揣平日不敢輕述所疑記得無此事亦并無所謂臺中者其人憶數年前曾爲省中王聚洲作一文內中或有趁筆一語未可知然亦記不清矣至謂指其事而詳之述之則斷斷乎自信所無也若他人贗筆相借則不暇問矣聊復

與秦履思二十

壬午

伏聞先公大故僕因坐疾久不及走弔抱歉日長方圖得

聞乃紆耿耿而至今尚無起色也奄困之狀與死爲鄰而已緬懷孝思不覺遂將卒哭日月易踰讀禮何似竊惟至性雖天授而經緯進反之地必賴感發而益明此學問之道所以無地無之而至於造次顛沛之間古人尤必備準則以示後人真令人一步不可踰越也喪禮之壞久矣力敦古誼爲末俗表坊非足下誰望幸努力

與履思二十一

癸未

踉蹌還家頗無佳趣卽朋好如故面目堪憐惟有懷思耿耿而已往還跋涉四千里備盡死亡瘡痍瑣尾之狀以視吾鄉人是樂土卽早魃太甚尚堪支持眼下正恐禍未必止此不日爲中原之續念之真不覺股栗耳救災捍患惟有修其本而勝之便是食藿諸君子坐下事若當事綢繆亦終是末著第恐并其未著而不圖勢不大壞極弊不止也小祥過久已當時出而與同人商素業精進且無量乎未及請教先此布懷不及一一

答姜仲海主事

銜

載續今文選

久違台教每感南陔之詩知門下舞綵翩翩致足樂也夫何而膝下之身將驟登之巖廊之上矣昔人謂天下喪亂忠孝道虧孰爲秉歲寒之節者門下庶幾其人乎今而往願益懋勉所移以永終譽宗周磔磔無似猥以罪廢孤踪濫茲環召揣分奚勝業在拜疏控引乃承台注至使命遠頒清言如屑高誼垂雲捧繹迴環殆亦一時空谷使人神往而未有已也其如潦倒朽廢之狀不能仰承萬一何倘邀台庇得終此一丘一壑以無過遺知己羞有厚幸焉耳

率爾言謝無任惓惓不莊不備統祈鑒涵

答范質公

載董編未刻

病廢之身棲遲日久索然生趣只得暫出通州然亦不能遂解維而南下也行後復聞關門告亟果否言念主憂臣辱草野孤踪魂夢欲絕所恃端人秉軸儀表士紳隱然以中國司馬而奪犬羊之魄以趨之北遁終在刻下乎頃聞台體遠和行時方得之張司馬不勝眷眷倉卒中遂未及告別反辱知己之念北風寄賦情見乎辭願言珍重草此佈復不盡愴爾

與倪鴻寶祭酒

元祐壬午

墨蹟藏復案家

蓬萊一別聆此眷眷道愛以去不覺魂夢之俱長而奄已再越三秋矣狼狽一身領此劇司重以時艱百爾鞅掌百爾困悴真是啞子喫苦瓜不能以告人乃知當日不量力而輕於一出爲計之左望年兄清光如在天上日欲奮飛而無從也前從令甥聞老姑娘稍有時恙且不久而愈慰喜慰喜老兄有親可事有道可樂優游綠野歟人間之福極於人世無多惟是時艱未艾匡濟胥人屈指海內第一流先輩典型不能不首及年兄恐東山之轍不暇久淹卽萊綵之權且以君父輜違乎而且奉扳輿而北又何患忠孝之不兩全也敢拭目以俟弟因病久乞歸不得將來定以嚴譴行而邀台庇免交旦夕情緒阻惡不能長言聊布濶私云耳

與族姪二

壬午十月

以下載董編未刻

僕於五月初旬感念時艱因而踉蹌出門決意以中途請

告而事機不遂又拜憲席勢在前進長安諸公亦遂不肯
饒此一老翁此其出處之狼狽終不能不遺有道之羞矣
一日受事百冗交集僕亦捐七尺以報君父已耳老姪新
得浦城之調展布若何蘖山調難之說幸深爲留意天下
事未有不以其難之心濟者以爲難則易者至矣至冰檠
之操尤宜時時自勉人言此地金穴口語易騰慎之慎之
最忌者尤是抽豐客亦須放一冷面以杜其後或竟贈以
俸金而去可也青芝姪窮途落魄自長安歸無資身之計
不揣一探衙齋挾願不奢幸卽以前法處之凡觀門人來
探者皆當作如是法惟將俸錢盡散贏得一身清白耳不
然交關請托之門豈可以門內開之乎匆匆附候興居不
一

與段幻然

然壬午十二月

已卯秋章格菴給諫自楚回得領先生大教娓娓乎當世
之感令人讀之欲泣乃弟草野之踪久自廢於人間又病
困日長足不能踰閫限一步遂於海內諸君子多付之落
落而回望九嶷雲夢間又杳然魚鴻莫問也時時啟之魂
夢而已一日拜明主賜環之恩又際時艱不恤襍被載道
稍欲結末後一著子不虛故人之望而孤戇性成深負主
知遂不免以微罪行想先生聞之咋舌不已乎正辭闕間
詢先生起居於沈少宰而喜可知也今天下無山林風氣
矣旅而進旅而退名者自爲名利者自爲利以終置人國
而不問養成一板蕩世界已矣不可爲矣所恃宗社有靈
聖明在上支持旦晚間幸而無恙復卜後事何如則弟之

道又奚望乎雖無老成人尙有典刑弟於先生亦云孰謂
桐江絲不足繫漢九鼎耶願先生善自愛日爲加飡臨風
愴爾布此濶私倘林臯相望之日長弟當繼此問道焉詩
扇一柄沙苑蒺藜一封引意不盡惓惓

答路廣心銓司

壬午十二月二十九日

去國之身頻承眷念感何以當時艱未艾亦只得在官言
官爲補救地誠使天下人皆在官言官而天下焉有不治
者乎則尋常學問正是做不盡處幸高明努力

復王天錫

爾祿癸未三月二十一日

接來教把袂之情不任愴爾何相念之無已乎人生聚散
總是此道流行任運之踪非徒爲此七尺軀者向道如執

事既進我以久要之盟矣不虛此會亦不虛此別各言努
力可也所論學從見地入古人固有是言要之取則不遠
只要自心討分曉亦儘次第理會得如所云無爲其所不
爲無欲其所不欲便是火然泉達之機故孟子曰如斯而
已矣又何加乎朱子亦曰見得義當爲便必爲利不當爲
便必不爲心下自肯自信便是格物致知此外更無玄妙
之可言也惟執事深信而篤行之行藏去住總當守其在
我而聽之於天無徒爲無益之憧憧開美又出尊示於燈
下讀之共相嗟嘆若執事果有江南之遊則二三同人亦
不患無留賢之計決不使天錫飢餓於道路也別諭及開
美者已托開美達之吾輩立身行已但守聖賢矩矱可也

與于太守二

癸未十二月

義烏聲息甚惡多是風鶴相傳昨有里人從彼中來者云其人皆手無器械不殺人但以白布纏頭而已縛縣官亦不加害乃知其事易解也惜彈壓無人耳倘時日既久必至蔓不及圖坐失事機可奈何蓋今天下多逃官矣按君借代而出境守道未任而參官皆逃之先聲也自此而外又可知矣嗟乎吾其披髮左袵矣方今城守之策只講求去得一逃字便思過半欲去此逃字則必無事張皇而心鎮靜爲主然則第一義便是治心也心不動則腳跟不動一人之心不動則千萬人之心皆兀然安於磐石矣今道臺未回部曲無主獨老公祖身任地方之重耳便宜行事亟須申明軍法凡倡逃者不論官吏士庶皆立斬以徇保甲中有不遵約束者概以軍法從事如此而後人心可一也

致柴延喜兵憲

新勳

時方多故所在蠢蠢淮揚當南北要害治兵一席特簡年臺意在消患未萌乎近聞大浸爲殃民其魚矣流離之輩不無嘯聚爲姦者非年臺風稜威望彈壓有素繼之以安集撫綏其能不爲秦晉續從此勳勞懋著浸浸大用矣共事春明聆教有日臨穎無任馳瞻

與黃跨千浙撫

甲申四月十一日

君父之危旦夕而幕府勤王之舉猶然泄泄吾儕真當蹈東海而死耳宗社有虞何言封守保此一塊土欲誰爲乎宗周更有說焉勤王之舉孤掌難鳴乞幕府亟草檄文起兩浙鄉紳各領其子弟賓客或三五十人或三五百人自

成一旅而統以撫軍左提右挈紀律森然以是而行真如手足之捍頭目子弟之衛父兄義聲動於天壤勇氣自然百倍庶中原南國有感動而興起者則不戰屈人兵之道也此說本俟張玉筥到議行今無及矣惟幕府力任之統候進止

與鄭總鎮

芝龍甲申五月

不佞宗周等不能以文藝佐武功而且往往撓敗之致國事至此一日宗社荆榛痛不忍言死不足贖區區江南一隅與隔江而守岌岌告急業已申大義於天下官兵義旅一呼而進行且大會諸軍進圖恢復仰荷大將軍戲下何啻瀚海長城顧今日緩急之勢在中原而不在南國臣子之分在君父而不在疆圉幸今新主已立天下朝宗中

興之業端可指日將軍奮跡海隅素得士心不特一方恃以保障卽宇內學士大夫識與不識無不仰虎臣壯猷當世無兩倘將軍亟提海師而進或扼江淮以正兵橫衝賊焰或趨津口以奇兵直搗燕京以將軍方畧素定慮無不指顧而集吹噓而定者審若此則中興名佐端必屬將軍一人是功垂盟府而名與天壤俱敝也倘將軍懷猶豫持兩端不立決肝腦塗地之計以報國恩勢必并無江南無江南亦安得有八閩安得有將軍家計念及此將軍可投袂而起矣成敗安危在此一舉宗周等敢泣血忍死以請聊當包胥之泣惟留意幸察

與左總鎮

良玉甲申五月

痛哉國事至此以聖明憂勤一十七載而一旦爲吾等文

墨士所賣罔辟之罪何辭今宗周等死亦已晚矣而猶不
卽死四顧僮徊尚有餘望於天下者徒以大將軍戲下坐
鎮荆楚使獻賊不敢窺荆襄一步而李逆亦不至驟下留
都故耳此誠國家中興再造之本也然將軍治兵梁楚間
久矣封疆破敗日甚一日僅得保殘楚於南陲以還朝廷
正以前日文墨議論動操短長以制其後如掣騏驎之足
而責千里縛孟賁之手而資格鬪之技豈不悖哉且也餽
餉不繼士無宿飽掣肘之中又掣肘焉卒致將軍才力俱
困而心亦不白於天下識者竊爲將軍痛之今幸天下有
君新猷丕振從前糝政一切更弦正英雄展布四體之日
惟將軍當國難君讎決不共戴天之志亟提一旅踰江而
進大會中原合諸路之師立圖恢復勢在反掌更復何疑

今日之勢進一步則一步之生路開退一步則一步之死
路逼將軍之不能以全楚固此身終此局亦明矣且朝廷
不恤以封侯之賞報前功而責後效待將軍不可爲不厚
而期望將軍亦不可爲不重且專一旦遭國事破敗至此
將軍能不仰天椎心投袂而起以圖報稱乎今天下人心
無不視將軍舉足左右爲重輕事機呼吸間不容髮倘將
軍猶豫不決使左右得窺其隙一旦進退不得自繇天下
大事去矣將軍忍以半世功名付之一擲滿腔熱血委之
冰炭雖悔何益惟將軍審圖之宗周等忍死以待臨書血
淚俱下不知所云

與劉總鎮

澤清甲申五月

國家喪敗君父蒙塵戴此普天不共之讎凡在臣子九死

莫贖而宗周等所不卽死以報地下者區區東陲尚有大將軍一人足爲半壁支耳惟將軍戲下文武壯猷功名早著於天下獨是前此文墨議論相糾纏頗喪魁傑之氣致戲下不克盡展龍翔虎視之畧以有今日嗟乎往事已不可問矣戲下處今日之勢一聞國變必已肝腦墮地求生不得幸而留此一生以報故主惟有據全齊之衆大會諸軍南援江淮北指燕趙恢復神京再興帝業真大丈夫不世之奇功汾陽不得專美於唐而韓岳諸公不得揚休於宋也當此普天喪敗之日決機赴難介不容髮若稍存顧恤身家之心欲一切僥倖以偷目前亦萬不可得舉足左右天下視以爲重輕將軍素以忠義矢之天日計所素訓之士皆敢死無前頃者留京之事大定國有君矣一舉恢復在反掌間痛念高皇帝在沃之靈必啟聖子神孫以中興之業萬萬無疑今一旦崩喪至此千古所無惟罹禍最奇而事成於反正亦最易時不可失志不可阻鼎鐘在前竹帛在後惟將軍審圖之臨書慟絕淚與筆俱

與李緝敬太宰

甲申八月

閒居深念每至與公出處聚散之故未嘗不歛歔欲絕何意國事遂至於此復何言哉復何言哉久不得音耗一日閱邸抄見公於逆旅中有飯僧一事亦留世間一段佳話僕得之復爲痛絕嗟乎彼一時也吾黨不能從先帝於地下旣已痛甚於死又有如僕等之頂進賢冠者寧不罪加於逃乎令叔已千古君臣朋友淚掬西江矣僕在官一月而告罷出此身於千鋒萬弩間苟偷一日之生終當以一

死報君父倘天下事尚可爲未必不屬之公公苟出而圖吾君宗周請受賜而死矣向者捧公手命兼示先君子不朽鴻文感同罔極忽忽不能寄謝歉恨無已然僕不能爲人臣敢問爲子不能爲子又將如不朽何行次雲陽邂逅詹侍御一言布濶不自禁其情之邑邑也

答祝開美五

甲申十一月祝子遺書此爲第四札

道體何以數數委頓至此僕又失此良晤感念無已血症之發不拔去病根則每發必重後將何堪乎聞之醫家言咯血出於心而通於腎嘔血出於肝肝爲血海治之差易然肝主東方生氣氣有餘卽是火而又乘於心風火相挾作疾易狂則亦惟有治心爲要法平日用心大過如一切躁妄心經營心期必心并義理思惟研慮心皆且放鬆但

減得一分便是減一分人欲減一分人欲便增一分天理人安有日置其心於天理之中而猶膺无妄之疾者乎无妄而疾可勿藥也或妄焉其容已於瞑眩乎先儒指之曰無欲作聖斯其旨也治心之外更無藥已養德之外更無身已來教似頗傷於猛厲只此便是欲也此等意思皆須放在平日用則得力若到手足忙亂便是心爲形役非徒無益而反害之矣道不可聞聞而非也古人云自然之謂道吾亦與之爲自然斯刻刻有聞矣適然固然之外得此又進一籌幸於病中理會此意何如僕還山失路情緒無聊每恨不得良友一把臂日望足下如望歲一見不可得足下幸自愛倘得握手春以爲期乎使者來適在山中修先塋人事匆匆草此作答不盡欲言悵然而已仲冬初九

日某頓首

答黃石齋大宗伯

甲申十一月

僕一日出山罪狀千萬踉蹌言歸舉目有江河之慟矣前在留都同志中無不望行旌如望歲而僕獨心卜門下高識決不落吾輩小草今日得一人不出爲吾道留碩果亦天下之慶也今忽傳駕抵武林想哭鴻寶諸君子來乎抑遂進而佐明主以中興乎或且問業徑山草堂暫繫吾黨之思乎先帝時門下不出而圖吾君門下苟出而圖吾君未必遂有三月十九之禍而門下且堅臥不出僕以爲大忍今何時也更可出乎以不貲之身犯當世之怒擊下子設俎相待之日久矣晚年剩此北天一雁飛去太忍徒死於讒死於賊真一死輕鴻毛再死之

矣安知天下事終不可濟乎子與氏有言當今之世舍我其誰石齋念之矣出處機緣總不可定在門下必動有可以自信者萬不至學牧齋之隨緣詭正頓隕生平入山已深不及渡江一晤殊以爲歉聊布哀款破涕從之

答張生考夫

甲申冬

里人還領手言識垂念惓惓愧老人近狀無似無可舉以報知己者出處之際撫今追昔轉有不自得於心者奄奄餘生何處是投死之地何時是夕死之期每一念之不禁於邑耳別示新功小著知向道之功大都反躬近裏者便是真實諦義政不必問其言之工拙得失也更勉而不已日有就月有將斯可矣僕老病入山新春少還了歲事茲且復裹糧爲長往計朋遊概絕屬有見訪之示敢祈且昔

人云尊所聞行所知足矣老人亦頗苦應酬知道誼之愛必能諒我同志中幸概以此意相致望望今乾坤何等時猶堪我輩從容擁臯比而講道論學乎此所謂不識人間羞恥事者也僕是以入山惟恐不深求死惟恐不速矣風便布懷并函來稿希照不盡縷縷錢字虎不及啟乞致聲并道書中意

宏光乙酉正月
附來書

來書云五月初傳聞先帝之變竊意夫子當即赴留都與立君討賊之議如唐李泌之至靈武及聞夫子立朝乃在八月道既不行竊意夫子即當拂衣以歸而夫子去位乃在九月二者或孔子可以速則速之義而夫子則俱遲遲何耶祥敢有請

國難初聞投死無地進既不足與有為退亦不足明守故前後兩事遲遲皆不得已也李鄴侯之至靈武托至尊有布衣交也若彼時君臣之義未定而先事進身幾何而不為近日時賢之所為乎三宿出晝僕蓋學焉而未遑總之立身萬不敢望古人不過守其經經之見云爾撫今追昔百感環生石經授受未明似不當過於主張闕疑之見良是但愚意大學之教總歸知本知本歸之知止已經景逸諸公拈出卻不知誠意一關正是所止之地靜定安慮總向此中討消息初經僕看出因讀石經不覺躍然頗謂斷非蔡中郎所能勘定况豐南禺先生乎善學者得其意可也

張氏履祥曰復古本是姚江一種私意大指只是排黜程朱以伸己說耳今試虛心熟玩大學之書謂文無闕終不可也謂簡無錯終不可也謂經傳辭氣無異終不可也則知章句之為功不小矣石本自是近代人所作偽本

先生後來亦病其割裂不復
主張矣聞之世兄伯繩云

與開美六 乙酉祝子遺書為第五札

使者去後念道體不置一作忘想當久已勿藥凡病發之驟者收功亦必易但須防其復耳以足下病中能理會學問轉較十分勇猛宜必有拔去病根之意使之永不再作方見大力量處從此益加培養元氣日固而雖有客邪不能入則培養壽命之要訣也總之心病之外別無形病治心之外亦別無調理血肉工夫神而明之存乎其人耳僕因先塋有未了之役三冬皆滯艸土中不得專役過候歲暮方歸茲者遣一奠於磊齋先生少存生死之誼不覺神思加愴敢遂訂握手之期慰我離索雲門佳山水是我輩避世緣也道駕惠然當為久聚計商疑發覆了此餘生見得

宇宙間尚有未了公案不無待於我輩則後死者所以不負前人也然而同心相信如足下者蓋亦寡矣率爾布悃外具福橘一封火籠二提引意幸叱存陳非玄叔姪相見時併一致聲春正月三日某再頓首

七 祝子遺書為第六札陳氏確注時開美同余過山陰予先歸開美留侍先生時致書相候前後共十數札

服藥之法以守中為上不宜一往峻治使因藥發病凡病未有不反成於藥者陰虛用地黃是矣然日用至七八錢似嫌過重蓋常病與驟病不同常久之病宜緩治也目下雖幸小安安知不因藥發病據愚見只宜用熟地三四錢再加生地黃一錢以入心經而亟去丹皮以安陰氣量減酸品以開耶火方是守中之法丹皮能破血而動陰火為

婦人之要藥若男子非所宜也血有淤滯則男子亦用之
六味丸之所以用丹皮者以疏茱萸之滯耳止入肝腎若
加麥門冬則丹皮全入心矣僕一生用藥備罹丹皮之害
又經明醫指點發前人所未發今世醫皆不知也假如僕
初立方用之而不効者丹皮爲祟也今胡先生之藥亦不
盡效者尤以多用丹皮爲祟也從前之用藥所以皆不効
者大抵丹皮爲崇習而不覺使人陰中其禍而不解今經
提破久之當自知也僕揣道恙姑宜用輕劑稍相機而投
似爲中醫而專致意於服食之間每日宜用乳酪一鍾以
養血龍眼四五枚以養神生地黃浸陳酒用一二杯以滋
陰不宜大濃如是者三五日未有不安泰者也只此是藥
調元之中而兼卻病也又烏豆時宜用之峻補陰氣此外
可以類推稍霽來訪不必作禽某頓首

八

祝子遺書爲第七札

馬星聚之言是或一道也但須審目下飯食多少何似如
且食漸減則補中益氣去升麻亦可用半夏厚朴桂附皆
不宜輕用終須存守中之見爲是人身十二經絡惟脾爲
陰中之陰而宅乎中央故所謂不宜太溼欲補脾陰莫如
酒炒白芍藥合參朮用之或且合山藥茯苓用最有益蓋
用白芍則地黃之意在其中五味茱萸之意亦在其中用
山藥則人參之意在其中可保萬無一失此外再加茯神
杏仁亦可瞽人草草致

九

祝子遺書爲第八札

語云肉氣勝則滯穀氣穀氣勝則滯元氣夫穀氣且能滯

元氣況藥氣乎氣清之人如小船不堪重載卽藥而投亦不宜用重劑況未必投乎譬如韓信用兵多益善漢高但能將十萬衆以是知用衆之難也用藥亦復如是僕前勅立諸方皆不過六七味蓋有意存焉味寡則奏功專而受弊處亦易明多則未有不失之嘗試者今試問之諸醫曰若爲君若爲臣若爲佐若爲使未有不茫然無以應者一君二臣三佐四使合之得十品此善用衆者也然而世無淮陰矣擇而取之不得已也醫者疑道也無行所疑守中之道也又曰三人行則損一人一人行則得其友以是知用寡之易於取勝矣假如用地黃則不必用龜膠今一人曰此地黃證也一人又曰此參朮證也一人又曰此二陳平胃證也衆論搖搖然莫知適從不得已而用地黃卽悞矣亦不至大害又益之龜膠是前日用五味又加烏梅之故智也此外可以類推用人參則不必用百合矣用天冬則不必用百部矣用茯苓則不必用米仁矣今用孫方未必盡投也人參之故歟抑百合之故歟弊在人參而疑及百合則枉百合弊在百合而疑及人參則枉人參教人何去何從乎浪戰之兵決不可用也又用龜膠斷不可用鹿膠卽不然亦須少加五味子獨陰不成也陽能化陰陰不能兼陽故也腎無陽則生氣絕矣焉能生木木無生氣則愈強而上反制肺則腎中之生意益絕此等意思庸醫知之乎凡治病最忌自用自專至於大項頭道理亦不可不自作主張

十 祝子遺書爲第九札

只扼定何思何慮勿忘勿助兩言做工夫便能尋向上去第恐峻絕處著手不得反成退步耳努力努力王先生言大學自是有病已經龍溪駁正可不待言即如足下所糾正者僕亦嘗有是言但終看作四項非大學本旨試以自心置在箇中一一體貼便如截流斷港動成隔礙也今可且將前人話頭一切放過專理會自家事如上文所云者久而有得方知古人多權不得以文害辭以辭害意耳草

復乙酉正月廿四日陳氏確注以上七字開美自注楮背後凡札尾記年月日者皆開美自注也

十一 祝子遺書為第十二札

今日可且偃息榻間不與於會恐自此復加疾也至囑至囑王醫生藥未知稍投否亦可且緩用藥不失為中醫據僕見二公之識還以胡為勝久當知之某頓首

乙酉二月三日

十二 祝子遺書為第十三札

會惠侯知道體未安紫眉來言亦然病必有酒肉之滋居喪者且然況裁之變禮者乎又病體大不宜樓居謂其助陽而虧陰也亟宜下處之正廳為望病中宜調理心性之泰已不待僕言而藥物次之脈本無恙而病症不除所謂人病脈不病不藥而自愈者也從前大抵為藥所傷目下亦然王思仁立方據愚見大有并如百合沙參女貞皆不宜用也胡友之方如去山萸減芍皮則頗可信矣然僕亦臆見也肺家一經無藥可清畢竟當求之紫苑百部山梔桑皮天冬之間大小蘄未知屬何經若破性多亦不宜用也匆匆不及備某頓首火肉一肘少佐藥餌

十三 祝子遺書為第十四札

僕初五日上鳳山不及過小學一晤時念道體不置也然別無可著力處惟勗道力堅定不生退轉心便能小卻魔王時時有霍然氣色耳何思何慮四字日已益看得親切否只今尊候往復不常此中能不動一下否纔動便懂懂與此體已隔天淵動處只是生死心打不破除卻生死利害心更何思慮之有謹疾之道在本分中亦一事事少不得但於本分外少加豪末則雜症候一齊俱作願更加理會不徒以畧見光景為得手也舊著有人極圖亦道著何思何慮處小兒當舉以誨教幸批示并讀易圖說候教某頓首接日新四答因匆匆不及即答并致奠夫

又 祝子遺書為第十五札

凡病不當以藥為命然亦不能廢藥世人只是生死於藥

中如易云无妄之疾則亦斷以弗藥有喜矣今姑以弗藥之藥一家常衣飯方子決取不至因藥發病者

一方 麥冬一錢三分 熟地四錢 茯苓七分

一方 麥冬一錢 百部八分

一方 麥冬一錢二分 山藥一錢五分 真白芍一

錢酒炒 茯苓七分 棗仁一錢炒 且五味子

七粒

古方二冬各等分二地各等分又取二地全分二冬半分今恐寒性太重故稍增減

一方 天冬四錢 麥冬六錢 熟地二錢 生地八

錢 名環玉膏

右用水三碗煎一大碗復將渣用水三碗煎一大碗

後將渣用水二碗煎一大碗乃同藥汁五碗共煎至八分再加煉密一小酒鍾調和如覺火起時用三五茶匙若覺有效稍增三五匙然總不宜多用恐傷脾胃也

一方 人蔘一錢 天冬八分 麥冬一錢 生地一

錢五分 熟地二錢五分 此名人蔘固本丸

若用瓊玉膏覺寒溼無効可用此固本湯一煎且作兩次服午前用一半且看胸中不煩滿否若不煩滿到申時又服一半過夜若安可用復煎一頓服也

固本丸中又如山藥茯苓枸杞巴戟兔絲五味等物又名加味固本丸然記不清可於本草一查或在天冬條下或在地黃條下或在人蔘條下此則病勢已退方可

合丸用決取有益無損者

凡病皆生於相火相火從此下故梔子不宜長用

一方 麥冬一錢五分 女貞一錢 山藥二錢 茯苓七分 山茱萸一錢 杜仲一錢 棗仁一

錢炒 乙酉二月八日

十四 祝子遺書為第十六札 墨蹟今藏杜煦家

參夫兄來接手教且悉近候緣來清恙大都以脾胃不和作疾非虛證也此後益宜以不服藥為中醫矣乃知從來皆悞也然矯枉過正此後又須受葠朮悞矣慎之慎之記得寒族有一少年患血症且雜症俱見諸醫用滋陰藥日久而愈劇後得名醫診視之但問日日進食幾何對曰甚少醫者曰得之矣乃用四君子加減合二陳平胃薑桂一

大劑主人稍試之午膳已多進繼服之竟終夜安貼飲食
大加諸症皆脫然次日迎醫醫者曰無所事予藥矣病已
退七分其三分待其自退若欲竟退盡則又因藥發病矣
遂不服藥而全愈積年沈痾一劑而收功世傳以美談今
請爲足下起无妄之疾可賀也病中證道靡見苦心身所
住處心卽在是甚善更須知此身非止七尺腔子滿世界
皆心滿世界皆身也故又曰天下何思何慮何曾止向七
尺討分曉乎爲此說者恐其神明受錮於形骸而漸起一
種自私自利之見耳不知大易曰兼山艮君子以思不出
其位認得位字清楚亦何至坐馳之有僕連日亦病甚先
此復屬愛劉某頓首 乙酉二月十一日

十五

祝子遺書爲第十七札

昨晚方自荒隴回得聆手教二三通稍知近况病中纔說
何思何慮不了卻又尋題目做文字學問未到從心境界
一切語言文字總不脫憧憧伎倆須知病中自有素位之
學前所云本分之外不得加豪末也舊稿聊呈覽不過稍
供岑寂則可耳何至遂蒙批示之詳如此合是主人不免
大饒舌惹出種種葛藤此後各須一切放卻老須爲老計
病須爲病計可也道恙本是陰虛之症止因投濕滯之藥
太多所以傷及脾胃不妨偶用葳朮以祛之此只是醫藥
不是醫病故近又有脇痛之症或是白朮炙甘大能實肝
氣肝挾相火因補成壅故作痛實非肺痿卽肺金受病亦
以金受火尅之故非尋常外感肺症如何用得桔梗天花
方書云肺以下降而順今降之不得而反升之豈非倒行

而逆施乎切宜斟酌無為庸醫所悞匆匆不及詳皮蛋入
枚米一斗奉用某頓首于道尊聞道駕在小學甚相向
往一致 乙酉二月二十日

十六

行止兩端怕不怕俱不得自是日用間平鋪直敘道理不
必就中又討下落反得苦趣也惟其日用尋常所以無人
理會纔理會破時如客歸家矣何虞再走作今只作兩邊
排遣中間卻得箇空字賊子便從空處入合是主人不

十七

只此見在心本無奇特本無欠闕纔豎一法作幫湊手便
傷本體昨所云怕死不怕死俱不得殆為是也然何如并
生死二字不提放教此中平坦坦還其見在乎此處工

夫愈尋求愈無頭腦愈打合愈成開斷病中且一切置之
即如人身本有自來元氣總為調理失節藥物受傷所以
成病愈藥愈病愈藥轉不得頭腦徒以七尺為兒戲
而已今上之且當置卻法身一段工夫下之并須置卻色
身一段幹濟直還其无妄之疾少日終有霍然起色時學
者不善理會這心今日豎一義明日又豎一義轉無相當
如建鼓而求亡子當愈求愈遠今日用寒劑以救火明日
又用溫劑以救燥種種是顛倒想其病從私心助長來不
可不察也而今設一治病之方第一不得懸想名理第二
不得理會詩文第三不得兜攬應緣第四不得衣冠拘束
迎送往來第五不得番閱書籍第六不得縱口劇談第七
不得雜投藥餌此外皆可類推盛价來傳夜來又盜汗是

元氣虛也又云盜汗屬陰虛自汗屬陽虛此等症凡久病人多有之弗怖弗怯方書之法當認定陰虛而少防脾胃一酌又切宜減酸收之品如山茱萸斷斷不可用雖虛扁復生僕亦當與之爭也諺云關門趁盜誰不知山茱萸係肝腎補劑然肝新大盛中挾相火豈可全用酸收之物卽云酸苦屬陰決少不得山茱萸然旣用五味則茱萸之義已在其中旣不用茱萸則澤瀉亦斷不可用若丹皮則用三四分亦不甚害姑聽之醫者可也六味丸加麥冬五味皆向來已用之矣何故不能除病則知此方非聖藥矣慎之酒一尊攜去奉用目下斷宜稍用滋味陰不足者補之以味用地黃一兩不如肉一臠又牛酥一餅奉和酒用之某頓首 乙酉二月二十一日

十八

祝子遺書爲第十九札

適聞以韭菜搗汁和童便飭如此治法立斃之道也非入心而敗血等紅花方寸已成孤注豈堪如此克伐有聞不敢不告弗謂僕今日不言并山茱萸切不可用再申叮囑某頓首 乙酉二月二十一日

十九

祝子遺書爲第二十札

牛乳酥之餉亦遂害事迺知胃中受寒受溼受積藥之所傷久矣故自今以後斷宜以止藥減藥慎藥爲治法前書已備茲不再陳冬月減芍藥以避中寒方書曾有是言然性補脾陰凡病陽必寒陰必熱故與山茱萸荻荅同用以避地黃之寒溼亦不至甚害要之亦瞽見耳慎之慎之聞道駕且欲西歸以尊先人有十週年之禮爲人子者情不能

忽然方在病中天又寒甚不便於舟車宜少緩之且以禮祭事付之令弟爲妥遺體行殆非孝也稍待清明節後此間上冢之禮少畢徑攜張惠侯一行尤便也人獲五錢此係公貲所措乞留用另薪水之資五錢給諸友之在事者亦于道臺意也并乞致聲義重聚樂習久而親不覺其病之去體矣乎僕廿八日又上平水有葬事不及遂晤豫告某頓首具 乙酉二月廿六日

二十 祝子遺書爲第二十一札吳氏蕃昌注乙酉二月廿七日時祝子以先人忌日在邇欲西歸先留之

病中用心不宜太苦凡足下抱歉處皆當以何思何慮四字化之庶於前日公案不成虛話然大段只爲生死心未除便生出許多心事雖未始非道念所發而已流於人欲之私矣天雨甚未得便晴卽晴亦宜眎氣體爲行萬不可嘗試於脩途以益增其病故特相挽留非情面上事也目今醫藥已可不悞靜養數日便得霍然平日躁心未平遇境便當抵勘得克己之法今豈謂吾親可忘政爲不敢忘親故一舉足而不敢易此下堂傷足之痛所以凜凜於當年也山藥數枚奉用每餐用三五錢只此是藥又蓮子少許亦與類同行蓮子生啖亦可熟則恐膩而滯氣也今日且不必見顧僕以廿九日上平水不盡某頓首 乙酉二月廿七日

二十一 墨蹟今藏復榮家

前相會見顏色多帶病容全是元氣受傷須大加將息目下且將葬親一事暫放卻且舉殯以待後日做勢有所不可急也醫藥調理大抵宜看氣血大分如氣血虛則四君

子湯補中益氣湯主之血虛則四物湯主之陰虛則六味
丸瓊玉膏主之氣血俱虛則八物湯主之或加桂薑如下
元虛則七寶丹丸主之前有人惠七寶丹方在案頭寄來
今已無尋其方以何首烏爲主卽載在本草何首烏條下
尋得何首烏雜藥皆不甚貴也凡此諸方看其脈理頭路
皆清不比後人草立前見丸藥方中有山茱萸丹皮在內
而又用黃耆以升之豈不大動陰氣乎所謂方以類聚物
以羣分兩相與則專三則雜而亂此醫家中切要之義看
尊恙大抵氣血俱虛而氣分受虧居多以其面色帶黃黑
也全無火氣故不紅然熱藥用久亦已動客火矣又脾爲
足太陰陰之至者也不宜多用熱藥如乾薑專入脾不可
多服又人之生氣全從肝愛斃甲大破肝氣亦不宜用多
况瘧已止尤不必用也諸皆可以意推人參五錢奉用克
念居士草草頓首

二十二

乙酉二月以下俱載董編底本

僕上鳳山不及過小學一晤時念道體不置也何思何慮
四字日已看得親切否只今尊候往復不常此中能不動
一下否纔動便憧憧與此體已隔天淵動處只是生死心
打不破除卻生死利害心更何思慮之有謹疾之道在本
分中亦一事自少不得但於本分外少加毫末則雜症候
一齊俱作願更加理會不徒以畧見光景爲得手也

答史子虛三

乙酉三月

吾輩遭時則得君行道扃戶則誦詩讀書自謂均之可以
抗志千秋了足百年豈知陽九數奇一朝相邁時命旣窮

茫茫天壤舉無容足之地偷息之鄉乎傷哉僕之有今日固宜來故人之弔矣遭難而不能死圖存而無裨於生是所謂丈夫而再辱者也時事至此儘有不堪觀不可究竟處人生至此儘有不堪觀不可作商量處惟丈有以教之若如來教所云乃是往日誦詩讀書一副清平道理施之今日誠用不著已然而時位不同通人建達節之業志士守固窮之素亦各成其是者耳則開繼之任翁丈在今日愈宜擔當精采十分矣囑望囑望若僕則俟命待死而已

答周奠維副使

夢凡乙酉五月

時事至此一逃盡之矣逃兵逃將逃民逃官而終至乘輿亦播遷而逃天下事尚忍言哉僕以越氓坐越土誓死不而已若欲出門一步區區垂死之人斷不能也以僕之

愚私揣會城諸公不遇招兵市馬伎倆將來并兵馬亦不能下一籌此天下事所以衰也爲今之計亟發勤王以迎乘輿一面露布明言奸人已誅主上何辜傳檄金陵連和諸將旋軫舊都策之上也暫迎乘輿駐蹕臨安作宋人故事策之中也臨安不已而吾越吾越不已而四明四明不已而閩廣策之下下者也今諸公卽招兵市馬亦出下下策足矣僕是以知天下事斷不可爲也親丈倘有下手處幸與熊雨殷熟思審處苟能轉移當事者肺腸去得一逃字庶或可出中策耳昨高經齋相公欲東渡僕亟移書勸止會城以謀匡復可一覓其踪跡與之共事此公稍稍人望所屬也其生義檄甚壯但推尊誠意仍是扶起奸黨之人恐天下聞而解體方今誰不知馬劉表裏爲奸以至於

敗豈可再尋復轍乎今日之事全賴親丈置此身於度外
延得高皇一綫瞻仰

與于瀛長

三

擊奸之疏震醒人心不啻疾雷之破贖從此天下事或有
可望但監國舉動尚無足恃此等疏即宜朝上又下何
全四五日全無行止景泰初二日筆殺馬順而監國規模
次第可觀今惜無其人耳請執事立發第二疏不必候旨
隨發三疏必得請必行其說而後已即宗社自此丘墟亦
可下見高皇先帝於九原而於臣子分誼亦浩然於天地
間矣昨奸豎屈尚忠就縛執事何不立行誅殛而寬之一
且虎兕出柙我越人無噍類矣凡係逃官皆可誅也夫暫
置獄中請旨定奪此平時守經之法非今日行權之法況
天下事萬萬非權不濟乎連日越城人心士氣稍有可觀
皆仗執事擊奸一舉而執事近日所以爲宗社留命脈爲
地方生靈留命脈者已可動天地而泣鬼神無俟僕之贅
也前約章格菴入城今此未來亟執事一趨之并請姚江
熊雨殷來酌議守御之人心不日必有險可恃但得人心
不動一面練兵集餉一而賊之計則將來一成一旅斷
可有濟於天下事出侍者執事一人耳執事存越則存天
下矣

啟

謝王止敬分巡楚先貞節啟

萬曆丙辰

恭惟台臺兩潤正氣一代孤忠德元於之黃之日君子
以見剝而傷表人心於萬世之秋吾道之不亡如綫去國

輕身猶頌子方之直同心許友尚思程伯之言祇今秉憲
一方猶託編氓餘庇屬小人有母未嘗君賜之羹而遺腹
稱孤亟訴蓼莪之痛雪涕荻灰空弔淒涼夜月回頭薦草
尚飛辛楚陰霜日惟猶子視手足以相憐孰是正人致生
成之大德方左之右之以推恩錄貞魂於覆日且大書特
書以示勸昭帝德於千秋此一役也幾迴人子之腸伊誰
爲矣罔極昊天之報夫亦婦節臣忠比論以相感遂使親
恩友誼沒齒而不忘也宗周學慙機斷志切淵臨念孤生
而發憤敢偷夙夜之心懷前哲而景脩深病木彊之質倘
獲分延溝壑庶幾一當君親將身退而道猶亨樂考槃於
獨寤或人出而我爲處言蘭臭於同人悠悠世道忍歌鳳
德之衰脈脈於心誰託歲寒之眷

謝李懋明按臺表揚先貞節啟

伏以大造難名配坤輿而並烈孤貞不朽啟天柱以爭高
採茲里巷之風立我蒸民之極恩覃錫類報切所生恭惟
太公祖閣下西臺法從命世忠謨平心體國若程伯子之
在熙寧直道無朋惟呂大防之生秦隴鳴鳳朝陽望望羣
鷓屏息褰裳南國行行斥鹵移春且嘉惠於林臯雖粉榆
蒲柳亦滋雨露之榮更董威於教化在江漢汝墳首採宮
壺之德如生母子尤荷甄陶烏鳥陳情已化子規之血夜
臺同穴重懸皎日之信表共姜於衛俗知君子之德風築
巴里於秦皇豈懷清之貨殖十五年子情罔極千百載帝
命維新非施德於不報孰爲存人於未亡使藐諸之托昊
天也終而天下之爲母子者定犬馬無知猶竭三生之事

項踵未效空遺六尺之孤如宗周者教慚機斷學墮弓良
中年自廢徒碎抱甕之心函丈非遙莫慰負牆之願倘或
誼存與冀庶幾景在桑榆煙霞已痼思寄業於縹緗杯棬
猶存念忝生於夙夜將擊壤而樂堯天欣覩夔龍事業且
飛鳥而回漢節早瞻日月光華敬候台旌肅將芹悃

謝劉石閭撫臺給扁額啟

竊惟通天地人曰儒踐智仁勇成德孔孟以降遞溯淵源
不離躬行近是漢唐以還獨推濂洛其間作者幾人自詞
章功利之習熾俗學驚爲濫觴而道德性命之說支多口
動以懲噎然有足不涉斯道之津徒以駿爾木強當聖賢
之實地抑何至學亦印哲人之可第因辱在草莽誤月旦
之浮評如宗周者也繫何人哉遐不謂矣少孩稱孤感奮

機杼之績丁年抱病棲遲章句之勞禔躬則小廉曲

媿籓籬之不固敢云中局能存涉世則好名喜事已占

衛之未閑何論出門以往總之行不反諸身處潛伏而多

疾實亦心本無所見欲向往而弗前語曰人苦不自知又

云不幸不聞過是可懷也曷以報之茲蓋伏遇太公祖臺

下道以忘我爲大心超象帝而誠以真血脈流通宇宙如

元氣之昭蘇萬彙而在在春隨實證脩模範家邦若大

治之陶鑄五金而各各尚象用是作我師保允矣獨擅儒

宗望千旄於巖穴飢渴由衷錐金玉之德音齒牙借潤榮

題真品濫及散才擬一生所不易竟之德業漫謂堯舜可

爲獵舉世所不敢居之聲稱譬諸穿窬而盜使溝澮取其

乍盈而章縫不難貌襲將好脩者望風而起近名之見恐

持世者借一以懲處士之羞則宗周之得罪於名教匪輕而台德之遜哲於士林轉甚雖吾黨莫不喙止在世道俾何淑焉昔晦菴夫子於交際不欲承有道之呼若子夏大儒在聖門猶致厯小人之勅伏望收回成命慨賜俞音鑒茲懇款之愚處以樸遯之分克念聖妄念狂敢不黽予衾影實勝善名勝恥庶幾奉爾韋絃以是嘉後進而紹前脩或可正人心而明世教何止愚生之幸抑亦儒學之光也

答章氏婚啟

伏以水木尋原三世德門作配金蘭託契廿年社席論交惟同心無閒於始終斯餘慶獲承以婚媾榮增筐篚喜溢門闌恭惟老舅大人門下全城華胄南宋故家五百年江左文獻才難鼎蔚於熙朝十五葉景定箕裘嶽降萃靈於

宅彼稷者我東越表扶輿之勝惟大則傑西京擅幹士雙作賓簡自先皇賜第盡優一榜禮樂際聖明之泰典宗伯而惟寅惟清藩屏高吳楚之勳佐司徒而以征以繕家學淵源會接龍頭之武林月旦爭攀驥足之塵江河日下太巨表德於鄉邦喬梓如臨小阮齊名於伯仲何斯葑菲猥辱葭莩惟先慈教子以三遷遂得奉我諸舅迨不肖館甥於兩世因而更辱通家在昔締盟總角已深鮑子之知於今遯跡衡門未薄羊公之鑒感媿平生申道義骨肉之眷殷勤夢寐託婚姻似續之時一門瓜葛自父自子以及孫六禮玄黃納吉納徵而問字顧令孫頭角崢嶸允占快婿如小女抱提婉婉曷稱良緣此非雅承舅氏之愛何以世世得附絲蘿抑亦仰體先人之心庶使生生不忘

銜結遡澄水以朝宗涓滴必歸東海望門牆而仰止夢魂
猶切高山春嚶黃鳥載賡伐木之聲律叶鳳凰蚤效于飛
之慶謹裁尺牘附答寸芹

因之善始建業秣指微賦以謝之報一門如故自父自子
之取以今茲祖商門未就羊公之靈靈歎不空中華建業
曾謂賦以兩世因而更舞賦與昔昔舞盟應黃日飛賦下
海北懸翠菊萃並去慈慈子以三靈發舞奉拜舞舞餘不
日才大日表辭賦賦賦辭賦詞公詞寶詞林詞詞詞詞
詞詞詞詞詞詞詞詞詞詞詞詞詞詞詞詞詞詞詞詞詞詞
詞詞詞詞詞詞詞詞詞詞詞詞詞詞詞詞詞詞詞詞詞詞
詞詞詞詞詞詞詞詞詞詞詞詞詞詞詞詞詞詞詞詞詞詞
詞詞詞詞詞詞詞詞詞詞詞詞詞詞詞詞詞詞詞詞詞詞

劉子全書遺編卷之五終

山陰後學孫開禮校刊

